



Iroun Beretitenti Dieter F. Uchtdorf

Te Kauoman ni Kauntira n te Moan Beretitentii

# Te Tangira ae Kororaoi E Kanakoa te Maaku

*Ti na katukui maakura ao ni maiu n oneamwiina ma te kukurei, nanorinano, onimaki, ao te mweeraoi n ninikoria bwa te Uea e raoniira.*

**T**ariu ao mwaneu aika tangiraki, raou aika tangiraki, ai kaku-kureira te tibwanga ni kaitibo inanon te Ekaretia ni katobibia te aonaaba are ti a katiteuanaaki iai n ara onimaki ao tangiran te Atua ao natina.

I kakaitau ibukin raonakira iroun ara burabeti ae tangiraki, Thomas S. Monson. Beretitenti, ti ururinga n tainako am taeka ni kairiiri, reirei, ao wanawanam. Ti tangiriko, Beretitenti Monson, ao ti tataro n taai nako ibukim.

N ririki aika a nako, ngke I riki bwa te titeiki beretitenti i Frankfurt, Tiaman, te titita ae tangiraki e kawarai n aki kukurei n tokin teuana ara bowi n te titeiki.

“E aki buakaka?” e taku. “Iai tao nakon aman ke niman aomata aika matunako inanon am tai n taetae!”

I iango tabeua te miniti ao imwiina I kaeka, “I taku bwa te matu n te Ekaretia anne bon teuana mai buakon matu aika te kabanea ni kamarurung.”

Kainnabau ae tamaroa, Harriet, e ongo te maroro aei ao imwiina e tae-kinna bwa anne bon teuana te kaeka

ae te kabanea n tikiraoi are I a tia n anga.

## Te Kabwarabwara ae Kautimata

Tabeua bubua ririki n nako I Amerika Meang, te kakamwakuri ae aranaki bwa te “Kabwarabwara ae Kautimata” e a buta iaon te aba. Teuana ana botoniango bwa e na kauiti mataia aomata ake a taraa n nimattu ni kaineti ma bwain te Tamnei.

Te Kairake ae Iotebwa Timiti e anaaki nanona ni bwaai ake e ongo irouia taan kabwarabwara ake kain te kautimata n te aro. Bon teuana bukina are e baireia iai n ukoukora ana kantaninga te Uea ao inanon teuana bukina ngkai Iotebwa e anga nanona n te tataro ae onoti.

Taan kabwarabwara aikai iai aroia ni kamwakuri, ni kabwarabwara ae katang, ma kabwarabwara ake a ataaki ibukin mwaitin aia kabwarabwara iaon kakaamakun te boobuaka i moone are tataningaia taan bure.<sup>1</sup> Atuun aia maroro e aki kamatuua aomata—ma e kona ni kariki tabeua miibuaka. Aia kantaninga ao teia e

taraa ni kakamaakuia aomata inanon Ekaretia.

## Te Ongotaeka n te Maaku

Rongorongona n taai akekei ngko, te maaku e a tia n kakaraoaki ni kabonganaaki ni kamwakuriia aomata. Kaaro a tia ni kabongan irouia natia, taan kammwakuri ma taan mwakuri, ao kain te tautaeka ma taan rinerine.

Taan rabakau n te iokinibwai a ata mwaakan te maaku ao n tabetai a kamwakuria. Aio bukina ngkai tabeua katanoata a tara ni kabonganai rongorongo are tao ngkana ti aki kabooi tirio ni kaingabong ke n aki kabooi witeo keim aika boou ke tareboon, ti na karekea te kaangaanga ni maiukanan te maiu ao ni mate n tii ngaira man aki kukurei.

Ti ngare n aei ao n iangoia bwa ti na bon aki kabwaka n aekakin nako kakamaku aikai, ma n tabetai ti karoia. E a korakora riki, n tabetai ti kabonganai aekakin kawai aikai nakoia tabeman bwa a na karoa are ti tangiria.

Au rongorongo iai bukina aika uoua n te bong aei: Te moan bon te kaungai ngkami bwa kam na iango ao ni karaka riki nakon are *ti* kabongana te maaku ni kaungaia tabeman—n ikotaki ma ngaira. Te kauoua bon iangoan te kawai ae tamaroa.

## Te Kaangaanga n te Maaku

Te moan, ti na kaineta te kaangaanga ma te maaku. Imwiin aikai, antai mai iroumi ae kakamakaki bwa e na katamaroa riki amwarakena, kabongana te roo n te kaintekateka, kabatia te kakamwakuri, kawakin mwane, ke n rairannano man te bure?

E koaua bwa te maaku iai korakorana ni kairoro iaon ara mwakuri ao anuara. Ma te kairoro anne e aki maan ao e kai toki. Te maaku e kuri n akea mwaakana ni biti nanora, ao e na bon aki kona ni bitiira nakoia aomata aika a tangira ae eti ao aika a tangiria n ongotaeka nakon Tamara are i Karawa.

Aomata aika a mamaaku a kona ni *kangai* ao a karaoi bwaai aika eti, ma aki *namakina* te bwai ae eti. N tabetai a namakinna bwa aki kona ni buokaki ao a rarawa, riki a un. N te tai ae maan namakin aikai a kairiira nakon te aki onimaki, aki ongotaeka, ao te kaitara.

Te kananokawaki, te kairi ae kairua nakon te nakoa ni kairiiri e aki tianaki nakon te aonaaba ae tiaki bwain te aro. I nanokawaki n ongo bwa kaain te Ekaretia ake a kakaraoi waaki aika aki raraoi—ni mweengaia, nakoia n te Ekaretia, n te mwakuri, ke inanon aia waaki n reitaki ni katoabong ma tabeman.

N tabetai, aomata a kona ni kai-koakia raoia, ma a bon aki kona n noria i bon irouia. A kairoro nakon te ongotaeka n irakin aia tua, ma ngkana a rawa tabeman n iri tuua aikai, aomata aikai a kona ni katuaiai n aia taetae, namakin, ao n tabetai n te mwakuri.

E a tia n taekinna te Uea bwa “ngkana ti . . . karaoi tianakin bwaai ke karaoan kairoro nakon tamneia natiai aomata, ni waaki aika aki raroai, . . . kain karawa a na kerikaaki [ao] Tamnein te Uea e na nanokawaki.”<sup>2</sup>

E na roko te tai are ti na kaririaki iai ke ni motikaki taekara ibukin ara mwakuri ni kokoaua bwa mwakuri nako a kakorua mwiina ae tamaroa. Ti kona naba n iangoia bwa man tianakin, katuaeakii, ao te kairoro e na tamaroa ibukiia tabeman. Tiaki, bwa te Uea e a tia ni kamatata, “Uaan te Tamnei te tangira, te kimwareirei, te rau, te taotaonaki n nano, te atataiaomata, te raoiroi, te kakaonimaki, te nimamanei, [ao] te taubang.”<sup>3</sup>

#### Te Kawai ae Tamaroa

Ataakin riki Tamara are I Karawa, nooran riki aron ana anainano ao

ni kairiia Natina. E aki kakai un, karekekai, ke ni kabomwi.<sup>4</sup> Oin ana kantaninga—Ana mwakuri ao Mimitoninga—bwa e na reireiniira, karietataira, ao e na kairiiri nakon onraken te Atua ni kabaneia.<sup>5</sup>

Te Atua ae kabwarabwara arona nakon Mote bwa e “atataiaomata ao e akoi, e teimatoa inanon te maraki, e batte nanoanga ma te koaua irouna.”<sup>6</sup>

Ana tangira Tamara are I karawa ibukira, Natina, are e aki kona n ataaki.<sup>7</sup>

Aio e kananona bwa te Atua e katinanikui ke tarariaoi anua ake a kaitara Ana tua? E aki, e bon aki!

Ma E tangiria ni bita ae mwaiti riki nakon ti anuara. E tangiria ni bita arora. E tangiria ni bita nanora.

E tangiriira bwa ti na arori baira ao n taua ni kamatoa te kai te biti, kaitarai maakura, ao n ninikoria ni waaki rake ao n iriira te kawai ae eti man irariki. E tangira aei ibukira ibukina bwa E tangiriira, ao ibukina bwa aio te kawai nakon te kukurei.

Ngaia are, e kanga te Atua ni kaungaia Natina bwa a na iriira inanon ara bong?

E kanakoa Natina!

E kanakoa te Atua Ana Riki Temanna, Iesu Kristo, bwa e na kaota te kawai nakoira.

Te Atua e kairiiri rinanon te anainano, korakai ae maan, amarau, nanoanga, ao te tangira ae akea tiana.<sup>8</sup> Te Atua e mena n ara itera. E tangiriira, ao ngkana ti bwaka, E tangiria bwa tina teirake, ni manga kataia riki, ao ni korakora.

Ngaia ara tia reirei.

Bon ngaia korakorara ao ara kantaninga ae kakaawaki.

E tangiria ni kakorakoraira n te onimaki.

E onimakiniira bwa ti na reiakinaki man ara kairua ao ni karaoi rinerine aika eti.

Aio te kawai ae tamaroa riki!<sup>9</sup>

#### Tera ae Buakaka n te Aonaaba?

Teuana ana kawai Tatan are e tangiriira ni kamwakuriia tabeman bon katukan ao karawawataan te bure n te aonaaba.

Te koaua ara aonaaba e a tia n tainako, ao n reitinako n aki kororaoi. E na rang mwaiti aomata aika akea aia kairua aika a na rootaki ibukin aron te karikibwai n aron naba man aia akiako aomata. Te aro ni babakanikawai ao te buakaka n ara bong a bon onoti ao ni kakamaaku.

Ma n aki tarai aikai ni kabane, N na kaibibita te maiu n te tai aei ma n aekan rongorongan rimoa tabeua n te aonaaba. Ti kakabwaiaki riki n ae mwaiti n te bong aei n kakabwaia aika tuai ririki mai imwaina, kakkurei, ao n tamaroa. Ai moara riki, ti kakabwaiaki ni kareke bwaninin ana euangkerio Iesu Kristo, are e anganira te taratara ae onoti n te kaanganga n te aonaaba ao ni kaotia nakoira bwa ti na kanga n totokoi kangaanga aikai ke ni kaitarai.

Ngkana I iangoi kakabwaia aikai, I tangiria ni katorobubua ao n tabeka bwanaau n te nebonebo nakon Tamara are I Karawa ibukin ana tangira ae akea tokina ibukiia ni kabane natina.

I aki kakoaua bwa te Atua e tangiriia Natina bwa a na mamaaku ke ni maeka ma te buakaka n te aonaaba. “Ba e aki anganira te Atua te nano ae mamaku; ma E anganira te nano ae korakora, ae tatangira te aba, ae kawanawana te aba.”<sup>10</sup>

E a tia n anganira bukina aika a mwaiti bwa ti na kukurei. Ti na tii riai ni kakaiia ao ni kinaiia. E kauringiira n tainako bwa ti na “aki maaku,” ao ni “kabebetei nanora,”<sup>11</sup> ao “tai maaku, ngkami te nanai ae uarereke.”<sup>12</sup>

#### Te Uea E na Buaka Ibukira

Tariu ao mwaneu, ngaira aika ana “nanai ae uarereke.” Ngaira aika Itiaki ni boong aika kaitira. Ti karekeia man arara bon te motinnano n ingainga nakon manga okin te Tia Kamaiu ao ni katauraoira ao te aonaaba ni Butimwaa. Ngaia are, ti na beku ibukin te Atua ao n tangiriia raora. Ti na karaoa aio ma te mweengaraoi, ao te nanorinano, n aki kataorikaaki aro tabeua ke kurubu n aomata, Tariu ao mwaneu ti katauaki ni kamatebwiaia

ana taeka te Atua ao n ongo ni bwanaan te Tamnei, bwa ti aonga “atai kanikina n taai, ao te kanikina n rokon Natin te Aomata.”<sup>13</sup>

Ngaira, ibukin anne, ti aki atatai n ana kakaewenako te aonaaba, ke n aki atai taai ni kaangaanga. Ma aio e aki nanonaki bwa ti riai ni karawawataira ke n teimatoa ni kakamakuia tabeman. Ngkai ti mena inanon ara kaangaanga aika mwaiti, tiaki e tamaroa riki bwa ti na boboto iaon mwaakan te Atua ae akea tokina, tamaroana, ao mwaakan Atuara, n onimakinna, ao ni katauraoi ma te nano ae kimwareirei ibukin okiran Iesu Kristo?

Ngkai Ana aomata ni berita, ti riai n aki kamwaukuaki man te maaku ibukina bwa ti maaka te bwai ae buakaka are e kona n riki. N onea mwiina, ti kona ni waaki nako ma te onimaki, ninikoria, teimatoa, ao n onimakina te Atua ngkai ti kaitarai kakaewenako ao tibwangara aika imwaairia.<sup>14</sup>

Ti aki nakonako ni kawain ana reirei n ti ngaira. “Iehova ae Atuam . . . boni ngaia ae airi ma ngkoe; E na bon aki kakiko, ao E na bon aki kitaniko.”<sup>15</sup>

“Ane e na buaka Iehova ibukimi, ao kam na kainababu.”<sup>16</sup>

Ni kaitara te maaku, ti na ninikoria, bobota ara onimaki, ao kaninikoriaia inanon te berita are “bon akea te kai ni buaka teuana ae karaoaki n ekiko nako ae na tokanikai.”<sup>17</sup>

Ngkai ti maeka n te tai ae kakamaaku ao ni mangaongao? Eng bon anne.

Te Atua are bon ngaia ae kangai, “ami bwai iaon te aba te rawawata; ma kam na kabebetei nanomi; I a tia ni kataea ana kai te aba.”<sup>18</sup>

Ti kona ni kamwakura te onimaki ni kokoaua ao ni mwakuri nako iai? Ti kona ni mauakina kabaeakira ao berita aika tabu? Ti kona ni kawakin ana tua te Atua riki n taai ni kakaewenako? Eng ti kona!

Ti konaa bukina bwa e a tia ni berita nakoira te Atua, “Bwaai ni kabane a na nakoraoi ibukim, ngkana [ko] nakonako inanon te koaua.”<sup>19</sup> Mangaia are, ti na katikui maakura

ao n oneamwiina ma te kukurei, nanorinano, onimaki, ao te ninikoria n ataia bwa te Uea e raoniira.

### Te Tangira ae Kororaoi E Kanakoa te Maaku

Raoraou aika kam tangiraki, tariu ao mwaneu inanon Kristo, ngkana ti kunea bwa ti maeka ma te maaku ke te nakonnano, ke ngkana kam kunea bwa ara taeka, anuara, ke ara mwakuri a karika te maaku irouia tabeman, I tataro ma korakoran tamneiu bwa tina kona n reireinaki man te maaku man maakan te nakoa mai karawa bwa kam na katoka te maaku: ana tangira Kristo ae kororaoi, ibukin “te tangira ae kororaoi e kanakoa te maaku.”<sup>20</sup>

Ana tangira ae kororaoi Kristo e kanakoa te karirii ni kaikoaki, kaka-maaku, aonikai, ke n ribuaka.

Ana tangira ae kororaoi Kristo are ti nakonako iai n nanorinano, ma te karineaki, ao te ninikoria bwa taan iriira ara tia Kamaiu ae tangiraki. Ana tangira ae kororaoi Kristo e anganiira te ninikoria ni waaki nako rinanon makura ao n onimakina mwaakan ao tamaroan Tamara are i Karawa, ao Natina, Iesu Kristo.

Inanon mweengara, n ara tabo ni mwakuri, n nakoara n te Ekaretia, ao ni kabane ara mwakuri ma raora, ao inanora, ti na onea mwiin te maaku ma te tangira ae kororaoi. Ana tangira Kristo e na onea mwiin te maaku n te onimaki!

Ana tangira ti na kona iai n ataia, onimakinna, ao ni karekea te onimaki n tamaroan Tamara are I Karawa. Ana baire ae akea tokina. Ana euangkerio, ao Ana tua.<sup>21</sup> Tangiran te Atua ao raora ara ongotaeka nakon ana tua te Atua e na karekea te kakabwaia nakon te rawawata. Ana tangira Kristo e na buokiira n riki n akoi riki, ni kakabwarabu-riki, n mamanano riki, ao n kabanei riki nanora nakon Ana mwakuri.

Ngkai ti kaoni nanora n ana tangira Kristo, ti na kauringaki n tamaroan maiura n Tamnei ao ti na nakonako ma te kimwareirei, mweengaraoi, n taratara ao ni maiu inanon te maiu

ae mimitonging ara Tia Kamaiu ae tangiraki, Iesu Kristo.

I kokoaua, ma te Abotoro Ioane, “akea te maaku n ana tangira [Kristo].”<sup>22</sup> Tariu ao mwaneu, raora aika tangiraki, E kinako raoi te Atua. E tangiriko n te aro ae kororaoi. E ataia bwa tera kanoan am bong n taai aika a na roko. E tangiriko bwa kona “aki maaku, ti kokoaua”<sup>23</sup>Bwa ti aonga n “raonaki n ana tangira ae [kororaoi].”<sup>24</sup> Aio au tataro ao kaka-bwaia n aran Iesu Kristo, amen.

### BWAAI AIKA A NA TARAAKI

1. George Whitefield ao Jonathan Edwards bon taan kabwarabwara a kinaaki bwa katooto n aekan aei.
2. Doctrine ao Covenants 121:37
3. I-Karatia 5:22–23
4. N te taina, te Tia Kamaiu e tangiria n rin ni kaawan Tamaria, ma aomata a tuuka Iesu ao aki tangiria ni butimwaia nakon aia kaawa. Uoman Ana reirei a bon rang n un n aei ao a titiriaki, “Te Uea, Ko tangiria ba ti na tua ba e na bwaka te ai mai karawa ni kamaunai? Iesu e kaekaia ma te kauring aei: “Kam aki atia bwa aekaki n aomata raa ngkami. Bwa e aki roko natin te aomata bwa e na kamaunaia ma e roko bwa e na kamaunia.” (taraa Ruka 9:51–56, New King James Version [1982]).
5. Taraa Moses 1:39; taraa naba I-Ebeto 3:19
6. Otinako 34:6.
7. Taraa I-Ebeto 3:19.
8. Taraa Doctrine ao Covenants 121:41 Ni koaua ngkana te Atua e kantaningaira, Natina aika iai rabwataia, bwa a na karekea te anua aei imarenaia, Ngai—te rabwata ae kororaoi are bon iai irouna aekan tamaroa n aekai nako—e na riki bwa banna ni katooto ibukin te anua anne.
9. N te Kauntira I Karawa imwain te maiu aei bon te kamatebwai ae moan te tamaroa are e kaota anuan te Atua. Ikekei Tamara are I Karawa e kaota Ana baire ibukin te waaki ae akea tokina. Bwai aika kakaaawaki te baire anne iai inanona te inaomata n rinerine, ongotaeka, ao te kamaiuaki rinanon ana mwakuri ni kamaiu Kristo. Rutibeero ni kaitaraana, e kaota te taratara ae kaokoro. E iangoia bwa ni kabane a na bane n ongotaeka—akea ae e na bua. Bon tti te kawai ni katiaaki aei e na rinanon te kairi ae matotoa ae kairoro. Ma Tamara arei Karawa e aki kariaia te baire aei. E kakaaawaki riki irouna inaomataia natina. E atiai bwa ti riai n aki karaoi kairua iaon kawaira ngkana ti reiakina raoi. Ao anne bukina are e anga te Tia Kamaiu, are ana anganano e na kaitiakiira ni kabane ao ni karekea okira nakon abanuean te Atua.
- Ngke Tamara are I Karawa e nooria bwa a mwaiti Natina aika a kaririaki iroun Rutibeero, e kairoroia bwa a na ira ana baire? E boaia ke e kakamakuia naake a karaoa te rinerine n rinea te baire ae kairua? E aki. Atuara ae iai te mwaaka irouna ni


- kabane e kona ni bon katoka te kakaitara. E kona ni kairoroa Ana kantaninga iaoia taan kabuakaka bwa a na ongotaeka. Ma n onean mwiina, E kariaia Natina bwa a na rinerine i bon irouia.
10. 2 Timoteo 1:7.
  11. Taraa, ibukin te katooto, Iotua 1:9; Itaia 41:13; Ruka 12:32; Ioane 16:33; 1 Betero 3:14; Doctrine ao Covenants 6:36; 50:41; 61:36; 78:18.
  12. Ruka 12:32.
  13. Doctrine ao Covenants 68:11.
  14. Ana reirei Moote nakoia aomata n ana bong e teimatoa: "Kam na tai maku. . . Taraa ana aro ni kamaiu Iehova, ae e na mwakuriia ibukimi n te bong aei" (Te Otinako 14:13, New King James Version).
  15. Tua Kaua 31:6.
  16. Te Otinako 14:14, New King James Version.
  17. Itaia 54:17.
  18. Ioane 16:33.
  19. Doctrine ao Covenants 90:24; taraa naba 2 Corinthians 2:14; Doctrine ao Covenants 105:14.
  20. 1 Ioane 4:18
  21. Ti na uringnga bwa te Tia Kamaiu e aki roko "aki kanakomaia Natina te Atua nako aon te aba ba E na kabuakaka te aba; ma E kanakomaia ba e na kamaiuaki te aba I Rouna.Ioane 3:17). Te koaua, "bon akea te bwai ae kakaraoia ma ti bwaai aika a na kawaka te aonaaba, n te aro are e anga oin maiuna bwa e aonga ni kairia aomata ni kabane nakoina" (2 Nibwaai 26:24).
  22. 1 Ioane 4:18; taraa naba 1 Ioane 4:16.
  23. Mareko 5:36.
  24. Ioane 15:10.

## Reirei Ibukin Ara Tai

**M**an Meei 2017 nakon Okitobwa 2017, te Nakoaibonga ae te Merekitereka iaon te kaua n Tabati a katauraoaki man teuana ke e raka riki taetae ake a kanakoaki n te maungatabu ni kabuta n Eberi 2017. Inanon Okitobwa 2017, a kona n rineaki taetae man te maungatabu ni kabuta n Eberi ke n Okitobwa. A riai Beretitenti n Titeiki ao mwakoro n rinei taetae aika a na kabonganaki n aia aono, ke n anga te katabeaki aei nakon te bitiobi ke te beretitenti n te mwaanga.

Taetae a kona n reke n taeka aika batu n te [conference.lds.org](http://conference.lds.org)

© 2017 ioun Intellectual Reserve, Inc. A bane n tauaki mwiin taian kariaia ibukin katootongana. Boretiaki n te USA. Kariaiakaki n te Ingiriti: 6/16. Kariaiakaki rairana: 6/16. Rairan te *First Presidency Message, May 2017*. Kiribati. 97925 859



Iroun Beretitenti Thomas S. Monson

# Mwaakan ana Boki Moomon

*I bubuti ngkami ni kabane n tataro mwaaka ni kamatebwaiā  
ao iangoa raoi ana Boki Moomon ni katoa bong.*

Tariu ao mwaneu aika kam tangiraki, I butimwaai ngkami ngkai ti a manga ikotaki riki n ana maungatabu ni kabuta ana Ekaretia Iesu Kristo ibukiia aika Itiaki ni Boong aika Kaitira. Imwaain waakinan au marooro n te bong aei, I kan katanoatai nimaua tembora ake a na kateaki n taabo aikai: Brasilia Brazil; buburan Manila, aanon Philippines; Nairobi, Kenya; Pocatello, Idaho; ao Saratoga Springs, Utah, USA.

Te ingabong aei I taetae n taekan mwaakan ana Boki Moomon ao kainnanoan kakawakina are ti karekea ngaira kaain te Ekaretia ni kamatebwaiā, n iangoia, ao ni kamwakura

te reirei inanon maiura. Kakawakin kamatoan ao kakouan raoi ana Boki Moomon e aki ti taetaekinaki.

Ti maeka inanon taai ni kaanganga aika korakora ao buakaka. Tera ae kamanoira man te bure ao te buakaka ae tabangaki n te aonaaba? I teimatoa ni iai au koaua ae matoatoa iroun ara Tia Kamaiu, Iesu Kristo, ao Ana euangkerio ni buokiira ni kairiira nakon te kamanoaki. Ngkana ko aki wareka ana Boki Moomon ni katoa bong, taiaoka karaoia. Ngkana ko warekia ma te tataro mwaaka ni kan ata te koaua, te Tamnei ae Raoiroi e na kaota te koaua nakoim. Ngkana e koaua—ao I kaotia ma te

koaua *bwa*—ngkanne Iotebwa Timiti bon ana burabeti are e noora te Atua te Tama ao Natina, Iesu Kristo.

Ibukina bwa e koaua Ana Boki Moomon, Ana Ekaretia Iesu Kristo ibukiia aika Itiaki ni Boong aika Kaitira bon ana Ekaretia te Uea iaon te aba, ao ana nakoanibonga te Atua ae mimitong e a tia ni kaokaki ibukin rakaia ao kakabwaiakiia Natina.

Ngkana akea am koaua ae matoa ni bwaai aikai, karaoa are e bon riai ni karaoaki. E riai bwa ko na karekea oin am koaua ni kaangaangan taai aikai, ibukin aia koaua tabeman ao e na uotikorake teutana. E ngae n anne, ngkana e reke, e kakawaki te koaua bwa e na kawakinaki raoi ao n reitinako n rinanon te ongotaeka nakon ana tua te Atua ao n rinanon te tataro ao warekan booki aika tabu ni katoa bong.

Raou ni beku n ana mwakuri te Uea aika kam tangiraki, I bubuti ngkami ni kabane n tataro mwaaka ni kamatebwaiā ao n iangoa raoi ana Boki Moomon ni katoa bong. Ngkana ti karaoia, ti na ongo bwanaan te Tamnei, n totokoi kariiri, n tokanikai n te nanououa ao te maaku, ao ni karekei buoka mai i karawa inanon maiura. I kakoaua ma nanou ni kabane n aran Iesu Kristo, amen.